

Oqaluuserisassanut nassuiaat.

(Inatsisartut Siulittaasoqarfiat)

Nalinginnaasumik oqaluuserisassat pillugit nassuiaateqannginninni Inatsisartut Siulittaasuattut pissutissaqartippara nalinginnaanerusumik oqaaseqaateqarnissamut.

Ulloq 13. november 2013 Inatsisartuni apeqquteqaat aallaavigalugu oqallittoqarnerani Meeqqat Illersuisuat pillugu assuarnartunik oqaaseqartoqarpoq inatsisartogarnermi akueriuminaatsunik.

Eqqaasitsissutigissavara Naalakkersuisuni Inatsisartunilu taakkulu suliffeqarfiini atorfilinnik, inunnilluunniimmi allanik maanngaanniit akissuteqarnissaminnut periarfissaqanngitsunik, Inatsisartut oqaluttarfiannit isornartorsiuineq ileqqussaangitsutut isigineqarmat. Tassami allaffeqarfitsinni sulisut taamatut isornartorsiorneqarnermut akisinnaaneq ajorput, taamatullu aamma eqqaamaneqartariaqarluni Naalakkersuisut siulittaasuat Inatsisartullu siulittaasuat tassaammata atorfillit, taamatut sulinerminni, iliuusaannut qulliunerusumik inatsisitigut naalakkersuinikkullu akisussaasuusut.

Inatsisartut ataatsimiinnerini oqaatsit akuerineqarsinnaangitsut allatulluunniit ajualannartunik pissusilersornerit qaqugukkuulluunniit atorneqaqqusaangillat, eqqaasitsissutigissavaralu Inatsisartunut ilaasortanut naatsorsuutigineqarmat ilaasortaqatinut allanullu ataqqinassuseqartumik ataqqinnittumillu pissuseqarnissaat.

Tamanna tunngavigalugu Siulittaasoqarfik sinnerlugu pisimasumik Meeqqat Illersuisuannut ajuusaarinnissuteqarluta allagaqarsimavugut.

Tamatuma oqallinnertaqanngitsumik tusaatissatut tiguneqarnissaa naatsorsuutigivarput.

Taamatut oqareerlunga ilisimatitsissutigissavara suleriaatsimi § 37, imm. 5 mallilugu ullumi pingasunngornermi ulloq 20. november naalackersuisumut apeqquteqartoqarsinnaasussaagaluarmat, taamatullu aamma ulloq 27. november apeqquteqartoqarsinnaassalluni.

Ullumi ulloq 20. november Ineqarnermut Naalackersuisoq apeqquteqarfigineqarsinnaasussaagaluarpog, silali pissutigalugu Nuummumut tikissinnaanngimmat, apersuinissaagaluag tallimanngornermut ulloq 22. novemberimut nuunneqarpoq. Pingasunngornermi ulloq 27. november Avatangiisinut Pinngortitamullu Naalackersuisoq apeqquteqarfigineqarsinnaassaaq.

Immikkoortut 64-ip 66-illu aappassaaneerpeqarnissaasa **UPA2014-imut** kinguartinneqarnissaannik Ilaqutariinnermut Peqqissutsimullu Ataatsimiititaliaq qinnuteqarpoq.

Imm. 64:

Soraarnerussutisiaqarluni ukiut angunerini annertuumik innarluutillit ikiorserneqarnissaat pillugu maleruagassat tunngavigalugit pisinnaatitaaffiisa annaaneqannginnissaanut isumannaarinninnissamut, Naalackersuisut peqquneqarnissaannik Inatsisartut aalajangiiffigisassaattut siunnersuutip, aamma

Imm. 66:

Angajoqqaat meeqqaminnik arsaagaasimasut angusassamik toraagaqarluni suliniafigineqarnissaannut siunnersuusioqqullugit Naalackersuisut peqquneqarnis-

saannik Inatsisartut aalajangiiffigisassaattut siunnersuut. Angusassamik toraagaqarluni suliniarnermi siunertarineqassaaq 2014-imi upernaanerani ataatsimiinnissami, angajoqqaat meeqqaminnik arsaagaasimasut angajoqqaatut isumassuisinnaanikkullu nukittorsarneqarnissaat, taamaasillutik meeqqat angajoqqaaminut angerlaqqissinnaaqqullugit,

Ippassaq ulloq 19. november oqaluuserisassaagaluartut, ullormi ataatsimiiffiusussami nutaami, tassa tallimangornermi ulloq 22. november oqaluuserineqassaput.

Piffissami ullumi novembarip 20-aniit 22-at ilanngullugu Inatsisartunut ilaasortat:

Sara Olsvig, Inuit Ataqatigiit, aamma Per Berthelsen, Siumut,

Juliane Henningsen, Inuit Ataqatigiit, aamma Doris Jakobsen, Siumut,

Ove Karl Berthelsen, Inuit Ataqatigiit, aamma Aleqa Hammond kiisalu ullumi ataatsimiinnermi,

Ruth Heilmann, Siumut, aamma Naaja Nathanielsen, Inuit Ataqatigiit, aamma

Gerhardt Petersen, Atassut aamma Harald Bianco, Inuit Ataqatigiit taasisarnerit pillugit isumaqatigiissuteqarput.

Eqqaamasassat

Piffissami novembarip ulluisa 15-anniit 21-at ilanngullugu Inatsisartunut ilaasortat Anders Olsen, Siumut, aamma Agathe Fontain, Inuit Ataqatigiit, taasisarnerit pillugit isumaqatigiissuteqarput.